

50 Jahre BarbarAnniter Jubiläumsfeier am 4. Nov. 2012 in der Bastei

Vortrag von Margitta Graeber als UrBarbara, Illustrationen von Karo Forbrig als UrAnn

Refrain:

**Och, wat es dat emmer schön bei uns om Ihrefeld
Wammer Fastelovend all zesamme ston
Fuffzich Jöhrcher fiere meer su wie et uns jefällt
Un dat weed noch fuffzich Jahr su wigger jon!!**

Leev BarbarAnniter, leev Fründe, leev Jäss
Hück simmer all he, denn mer fiere e Fess!
Ehr hatt et jehoot un et es wirklich wohr
De BarbarAnniter, se sin fuffzich Jahr.
Do steit die Zahl, en Jold jeschrevve
Un mer fröch sich, wo es die Zick jebilevve,
wo sin die Johre, mer es janz verwundert,
do leever Jott, jejründet em letzte Johrhundert!!

Dröm künnt ehr üch jetz, un dat ohne foppe
Ens selver stolz op de Scholder kloppe.
50 Jöhrcher, die hatt ehr met links jeschaff
Un jetz jeit et wigger, met voller Kraff!!

Doch et ehts weed jefiert, dat hät uns jefreut
Un su hammer kein Koste un Möhde jescheut
Han de beste Komponiste bestellt,
Texdeechter un alles, wat sich doför hält
su es se entstande, uns Hymne för hück
Un die singe mer jetz,... ehr künnt dat, leev Lück
Hollt noch ens deef Luff un dann jeit et loss
Dr Vrängel jedriecht und af jeit de Poss:

Refrain:

Och wat es dat emmer schön.....



Mer fiere fuffzich Johr BarbarAnniter hück
 Un do frogen sich immer noch janz vill Lück
 „Wä hät sich dä Name bloß usjedaach“
 Jung, dat es ävver doch en janz einfache Saach:
 He ston mer vör Üch, Zint Bärb un Zint Ann
 domet dat och jeder erkenne kann
 Dat sin uns zwei Kirche om Ihrefeld
 Wo mer levve und wo et uns jot jefällt.
 Un weil die Barbare un och die vun Zint Ann
 Janz kräftich Fastelovend jefiert han
 Wood nüngzehndreiunsechzig janz schlau üvverlaat:
 Vun jetz an weed en Setzung zesamme jemaat!
 Mer jon en de Börsensaal un dann
 Weed Fastelovend jefiert met allemann.
 Un wie dat he Brauch es, su alljemein
 Do jründ mer zoesch ens ene richtje Verein.
 Dä Name, dä wor dann janz flöck jefunge
 Zwei Fraulück em Name, dat es doch jelunge
 De „Frauenquote“ erfüllt un dann
 Metjleed wäde kunnste ävver nor als Mann!
 Un domet dat nit janz esu „weiblich“ war
 Wood us Barbara flöck ene „Ur-Barbar“.
 Su woren de „Jründerväter“ em Jlöck
 Doch ehr künnt uns jläuve, mer hatte alles em Bleck!
 Su es dat em Levve un mer weiss doch genau
 Hinger nem jode Käääl steit en starke Frau!
 Un wat se jemat han, dat wor wirklich jot
 Dröm hammer bei der Setzung allt off jehoot:
 „Ohne BarbarAnniter-Setzung em Johr
 Dät uns all jet fähle,“... sat, es dat nit wohr?
 Dröm singe mer jetz noch ens voller Loss
 Dä Vrängel jedriecht un af jeit de Poss:

Refrain:
Och, wat es dat emmer schön ...

50 Johr BarbarAnniter, wat uns dobei wundert
 Dä Verein wood jejründet em letzte Johrhundert.
 En de sechziger Johre, leeven Jott, es dat wick,
 dat wor jo verhaftig en andere Zick!
 Computerspille un Internet
 Odder ne ei-Pot, dat jov et noch nit.



Et jov nit McDonalds un och keine Döner
 Doheim wor jekoch, sat, wor dat nit schöner?
 Och dä Ballermann wor noch nit erfunge
 Ehr hatt samsdaachs en dr Kumplet jesunge!!!
 Bezahlt wood en Jrosche un en Mark
 Un die wor domols noch äch stark.
 För e Kölsch beim „Petschaug“ op dr Eck
 Do woren doch jrad ens fünnef Jrosche weg.
 Un wat mer hück kaum noch verklöre kann
 Mer broot domols noch nit ens e h a n d y han!!
 Ehr troft üch zom schwade, wat wor dat noch Jlöck
 Denn kei Handy- Jebimmels reef einer zoröck!
 Et jov och kei Navi, es dat nit jelunge,
 Ehr hatt och esu jede Wäch jefunge!!
 Un zwei Prujramme jov et bloß en dr Flemmerkess
 Jo, do wor et för üch doch et allerbess
 Wann sich Sunndaachs en Zint Bärb dann all trofe
 En dr Ungerkirch zom fiere un och zum schwofe!
 Met dr eigene „Band“, do wor ech jet loss
 do wood dä Vrängel jedriecht un af jing de Poss:



Refrain:
Och, wat es dat emmer schön

50 Jahr BarbarAnniter, do frogen mer dann
 Wat han die bloß, wat andre nit han???
 Wie kütt et, dat die su zesamme ston
 Un durch deck un dönn als Fründe jon?
 Och wann et ens Knies jov, et es emmer jelunge
 Noh kooter Zick hatt ehr üch widder jefunge.
 Su künne mer sage, un do simmer janz fruh:
 En unserm Verein, do es dat esu!!!
 Un em schlemmste Fall, do helfe meer dann
 Et Ur-Barbara un och et Ur-Ann!!

Och wann em Vürstand nor Mannslück jesse
 Beim fiere han se de Fraulück niemols verjesse.
 Do jitt et – för e Beispill - dä Wanderdaach
 Ejal, ov et rähnt udder et Sönnche laach
 Do sin se all do, met voller Kraff
 Met dr janze Famillisch op Wanderschaff.

Jedes Johr muß sich einer jet enfalle loße



Un op die Tour kennt ehr allt Wäje un Stroße
 Die ehr söns em Lääve nit kennejeliert
 Un hatt su mänch Jrillfess em Jröne jefiert.
 Nor dat eine es wichtig, dat muss mer verston
 Niemols darf die Tour no Kävelaar jon.
 Denn su lautet die Sage, un do schwöre mer drop
 Eimol Kävelaar, un d'r Verein lös sich op!
 Dat wör doch en Schand, un su hatt ehr jeschwore:
 Öm Kävelaar emmer ne große Boge!!!
 Dröm wolle mer 3 x op Holz jetz flöck tuppe
 dann weed dat och 50 Jahr wigger fluppe!!

Dann jitt et en Tour, wo mer sich lang drop freut,
 denn do kritt mer richtich Kultur rinjedeut!
 Zick Johre lot ehr üch jän verzälle
 Vun allem, wat et jitt un jov en Kölle.
 Un do hatt ehr zom Jlöck ene KääL jefunge
 dem es dat och emmer widder jelunge.
 Ov en Müllem, en Düx, en dr Altstadt, am Rhing
 Jo, sujar Düsseldorf hatt ehr op die Tour jesin!
 Un dröm wesst ehr jetz och op alle Fälle:
 Dat Schönste an Düsseldorf...es die Rückfaht noh Kölle!!
 Momang...Wo es dä Mann?? Kumm ens flöck erop, Jung!!
 Denn eines Daachs do sat dä janZ drügg
 „Am leevste wör ich BarbarAnniter bei Üch.“
 Dat jing dann janZ flöck un su kom et dann
 Dat de BarbarAnniter ne eige „Kultur-Büggel“ han!

Voll Stolz singe mer dröm all us voller Bruss
 Dä Vrängel jedriecht un af jeit de Poss!

Refrain:
Och, wat es dat emmer schön....

Doch dat Allerschönste he op dr Welt
 Es dä Dingsdaachs-Zoch om Ihrefeld!
 zick Jahrzehnte es dat för üch janZ klor
 D a t es dä Höhepunk vum janze Jahr.
 Voll Freud weed dä Wage dekoreet,
 Met dem neueste Orden toll verzeet,
 De weiß-bunte Anzöch sin emmer adrett
 Un leuchte em Sunnesching öm de Wett.
 Lakritzstange, Strüßjer un Schukelad



Die hatt ehr massisch em Büggel parat
Un am Stroßerand hört mer emmer janz froh:
Och luur ens, de BarbarAnniter sin do!!!
Mer kennt üch, mer freut sich un su soll et blieve
Dat möht er üch all en et Hätz erenschrieve!

Ävver dis Johr, do weed dat all noch jetopp
Do lägt ehr nämlich noch eine drop:
Denn pünklich zom Jubileumsjohr
Do weed dä jröbste Draum noch ens wohr:
Em Rusemondaachszooh treckt ehr dann
Voll Stolz durch de Vringspooz met allemann!
Un wenn dann noch de Sunn schingk, janz Kölle op Jöck
Jo, wo jitt et dann e jrößer Jlöck??
Völlig platt, ävver jlöcklich roft ehr dann am Schluß:
Dä Vrängel jedriecht un af jeit de Poss:

Refrain:

Och wat es dat emmer schön....

50 Johr BarbarAnniter, en lange Zick
Un dat wor nit emmer nor Freud un Jlöck
Do jov et och Krankheit, Sorje un Nut
Un e paar vun uns Fründe, die sin allt dud.
Doch meer han se em Hätze, en Freud un en Leid
„Jott trüs se en dr Iwigkeit.“
Su es dat em Levve, mer kumme un jon
Dröm es et janz wichtig: zesamme zo ston.
Och noch su ne staatse Präses.....allein
Hält dä och nit am Levven dä janze Verein.
Do bruch mer vill Häng, vill Hätz un Jemöt
denn nor su klapp et, dat dä Verein wigger blöht!
Un dann möht ehr noch e paar junge Lück finge,
die wiggermaache, wann die „Ahle“ nit mieh künne!
Doch noch jeit et wigger, wie ehr et emmer jemaat
Met fiere un laache op BarbarAnniter-Aat,
ov Haxe-, Fesch- udder Weihnachtsesse
dat alles künnt ehr bestemp nit mieh messe.
Un met himmlischem Säje do klapp dat och dann
Dat jaranteere et Barbara un och et Ann.
Un en 50 Johr, dat versprecht ehr uns hück
Sidder all widder he zom fiere, leev Lück!
Dann fiere mer **hundert**, ejal, wat et koss
Dä Vrängel jedriecht und af jeit de Poss:



Refrain:**Och wat es dat emmer schön**

Wat soll mer noch sage, dat wor et, leev Lück,
meer zwei jon jetz flöck en dr Himmel zoröck
villeich noch e Kölsch un ne jode Rot:
bleivt all, wie ehr sid, denn su sidder jot!
Maat Üch vill Freud un denkt dann un wann
an uns zwei: et Barbara un et Ur-Ann!!!

Kölle Alaaf